

四庫全書

集部

欽定四庫全書

江湖長翁集卷四

宋 陳造 撰

五言古詩

泊海子口

池口至海口望望三舍外辰發莫已到回首西日在風
師肯憐客祖道煩一嗑我舟疑凌虛楚山真厯塊蜚鳥
相讓疾驚浪乃弗逮窮塗坐局縮頗嘗得此快遄邁自
本圖闕供恐貽悔未辨問村膠且計具薪菜

泊小姑山

楚山屹兩姑我見乃其稚聞名詩卷間識面容舟次玉
刻極端麗簷植暝蒼翠娟月上天角相與詫嫵媚怒風
將我西未愁卜晚憇山足舟可艤山木纜可繫山外正
風波獨此佳食寐斷知有神物主此勝絕地明朝捐行
橐可無荅神賜白鷺雪為肪綠蟻香馥鼻舟穩風又熟
無乃契神意未暇訪彭郎辭費辨非是

郭家洲

攜兒上絕岸微徑步蒙密人稀鳥鳥樂老屋幾百室荒
涼郭家洲籬落映殘日問俗得周旋磨門頗倉卒興哀
今昔殊郭姓尚十七鄰里闕鹽茗翁姬僅盥櫛共說頻
歲歉平陸江浪沒場圃或潭洞椽拱行蟪蛄去秋微收
爾樵採取黔突接耳多樂郊一去恐兩失吾邦有杜母
撫我不待乞蠲租桑柘在休役孫子佚意使流殍無寧
後倉廩實官今潯陽來吏師那容失書紳拜此賜知我
佐郡紱古來裨肉食多自芻蕘出必若窮吏道孰先究

民疾剥膚快目前吾固笑無術

富池廟

買香馬頭西跂望富池口我帆廟下卸祗費一炊久匆
匆索冠裳董董辦牲酒所取薦蠲潔不必須富厚精魄
我為悚勇節公則有出門聞風聲萬竅一吼吼林摧巨
木折江驅雪山走繫纜下窓坐齋心念神佑鄰舟曹冒
去膽碎面鰲黝非今羞供留例亦懼釁咎交神不用卜
遲速示可否噬將捨舟楫望望終稽首

離富池

江流寂無聲明滅窓月曉客枕歸夢餘意先西蜚鳥雪
天信少風翳面正繚繞富池忽信次肯羨雕鷲矯向免
犯險艱神惠顧豈少今晨有佳興調笑向諸小波平旗
脚直康莊馳騷裏鱗鱗到座隅健鵲啁林杪人家積蘇
間山影橫練表未成官縛去得句吾事了

馬口

氛昏翳春曉矐目如受蒙停舟少須之紅日碾高空是

時羣山間積雪未肯融巖霧不盡收似角藻繪功屏障
莽回合粉墨紛異同嵌巖眩有無草樹森玲瓏晶晶瓊
為田奕奕旆卷風幕籬抹高頂下乃卧玉龍隱顯隨斷
續間遙成蔥櫛微漪湛不搖一一縣鏡中酒杯與詩筆
客次寧闕供塞取不貲景納我雲夢胸一笑漂泊裏孰
謂吾塗窮摩抄好東絹世恐無此工

銀葫蘆

山水佳有餘我與之周旋江行已久矣今復領其全漾

舟銀葫蘆雪在春漸妍素瓊間蒼玉化工與雕鐫屏圍
無空缺護此百頃天圖畫別濃淡粉墨生雲煙人間有
此境定屬水府仙先生嗜竒勝久駐無由緣命名失雅
馴吾意終慊然玉鑑扁山石取重須時賢可無泊舟所
作亭近江壖登臨付楚客當有雲錦篇

回風磯

大江悠悠去淥靜初演漾山石齟齬之湍險乃萬狀君
看回風磯却畧不可上椒石卧中江與江作陂障鏜沓

匯石下瀾澎劇奔放北磯屹對峙其中過舟舫水流作
高下咫尺便尋丈我行返壑餘坐想潢流漲頽波次濫
瀕如馬亦如象攫觸寧完舟竒禍此無妄入峽與上龍
艱惡偕巨量下澤遵夷塗回首一怛悵

龍眼磯

甚小而巧
漁者聚焉

誰謂石一拳不作江流礙朝來揚帆西瞥若驥歷塊龍
眼風火磯培塿視華岱似聞潢潦時亦復鼓湍匯鑿去
本不難竒巧禹所愛其上嘉樹密其側魚網曬居惟羨

漁鄉復欲老犢背西歸儻得此庸敵七里瀨

散花洲晚泊

畧眼毛山夾枯涸不可留風帆劈箭去遼海吹一漚長
年面死灰死爭如赴仇一飯六十里幸泊散花洲呼婦
具盥櫛命酒浣驚憂我無資身策老計餬口謀勿云朝
不坐叱馭復何求奔車非伯夷覆舟無孔邱薄德既謝
此身世付浮休亦念三徑具歸從沮溺遊笑說今日快
擊轅為渠謳別留初孰酒飲處酌陽侯

庾樓

晉起不由德亦坐崇清虛陵夷莫挽回後世猶受汙庾
非適用才夷甫真其徒樓以庾得名而庾復且迂面勢
瞰空閣簷楹煥丹朱遐想如不及效尤無乃愚風流與
經濟本自珉玉殊空譚養虛譽胎禍取炭塗峻約火燎
原典午轅下駒舉扇障蜚塵王叟寧厚誣狗名不既實
扁榜誰權輿得興偕下僚小節安足模捍患識黃樓仰
高題景疎于是復間然吾言乃迂儒

題六宜堂

昔人厭俗心寧取無肉瘦平時眼為青綠士須客右立
節自修竦適用兼庇覆君家所居堂音響不待叩千溝
蔭百椽一一渭川秀公今王元之好尚如授受記樓賦
此堂異聲同一味心謀耳目適所樂壹能副昔人言外
意泥一乃百漏拘拘六者間見未脫科白我此小盤礴
萬境歛通透徐步寒玉瑱長謠靈籟奏主人信清絕此
君舊幽茂並策超俗勲醉墨點衫袖

次韻余司理

余為隸所陵見告
治之有詩次其韻

名分屬我輩那容狗多可勢由服勞屈享以綦貴夥積
水須固防易溢不難破勸沮自有機懲一警千箇世儒
略其本顧詳獄狂課彼頑工抵巇未可援宥過奸名犯
具分論罪不在大吏姦易為熾士氣寧受挫漏網容汝
輩厚顏向此座新詩驚老眼唱高信難和向來搏虎手
老去但慵懦近者勞阿買金薤編玉唾此詩尤傑出氣
有江山佐揆予收新得比君倍當賀

禱雨福溪巖

巖下初無旱意
蓋泉所沾溉也

我訪福溪巖行行黍稌中人家打麥罷鄰里笑語同迎
官問來意不信有蘊隆淙激田間泉詰曲走青虹此泉
有餘用此巖無闕供福巖真福地為民保年豐縹緲三
花仙蜿蜒千尺龍脩然乞靈地陪此超世翁是巖既磨
滅是泉乃終窮洪慈小決擇妙化符鴻蒙彼此猶屯膏
無乃坐怨恫稽首貢此言庶其鑒丹衷

近榆亭

予以近榆名亭取少陵詩種杏仙家近
白榆而梁教授作長篇見贈以詩句為

韻答
之

小亭園西偏政復園取重扶疎百本木自昔誰所種敷
舒曉霞爛磊落金丸奉城東詩客在端許與此供

董老故自貧但有滿林杏別令雕虎守探囊續人命我
老斷狡獪昔人慵季孟惟餘隱几地可愈俗子病

天亦積氣爾種榆誰所傳人間自得得何適而非仙少
陵健於辭暇計然不然長翁名亭意繫影更可憐

何年歲星精

典術曰杏木
歲星之精

夜辭天帝家幻為賴鄉種增

賁別乘衙似聞綵鳳舞天風亂晨霞尚當月林飲一搯

漁陽槎

予到官此
花已過

坐亭撚吟髭搯挾了不近詩來良為吾吮漱賸芳潤遽
令方丈屋遶壁走虬蜃何如嶺頭梅題品得何遜

撫華復食實果部誰稱伯兄桃李其弟無若此眉白三
玄信殊稟五沃擅嘉殖藏核待東歸分供橘奴帛

少日接為構無何了桑榆邀食有餘地何事須千奴此
亭與此木到眼聊為娛五詩信睡語定博君盧胡

荅余司理

余以予在定海時宿雲巖韻作詩見遺故荅之

緬懷海縣遊不作千山隔雖償還俗債

自教官作邑人謂還俗

茲

復望霓厄孰知赫曦中歛有油雲升六幕一汛掃病骨
如濯清西山殷其雷晚溽尚雨意頗思雲巖宿靜聽崩
空勢靈湫貝為宮龍伯肯小留與翁寧兩心當亦憂民
憂願龍噓為霖曠電歸袖手免令山城民議我拜土偶
千里飫玉粒秉穗周困窮牲肥酒如油歲歲敬為龍

教授有詩再次韻

人間望晴雨長若物所隔
虧成間十五嘉穀信多厄
假手方寸丹誠與爐煙升
風伯齟齬之不容徹九清
玄雲起西北似副祈禳意
驚飈塵晚空汎灑第末勢
寄聲主雨神雲車盍小留
咄嗟澤枯槁為人消殷憂
輔帝凝太和繫子一引手
如昔五三代濟時須聖偶
詩壇我賤工康莊自途窮
眩旋向良樂並御天閑龍

次韻余司理路監嶽

瑞巖禱雨是日雨明日雨足二公有詩因次韻

入山日正烈出山雲忽濃
身疑潤空青旋覺霏雨濛
歸

來坐良夜淙瀉如崩空縣知焦卷地轉眼青茫茫似聞
移晚秧竭蹶不暇慵人計故新年已判一倍豐此惠究
所自無乃西山龍澤物龍能之叱使則天公我行與雨
會僅殺顏發紅地上螻蟻臣渠敢貪天功兩公壯藻思
表表千夫雄新詩猥見予拜賜豈所蒙得意筆生春狀
物斤成風生世有如願兼得寧易逢此詩自宮商為君
絃枯桐準擬鷄酒社往和擊壤翁

和陶淵明歸田園居六詩

予漫仕代耕山林之意無一日忘顧口未餬
爾官上得師文書知墾荒田竟自此告功必
醜曩志乃和淵明歸田園居
詩以自堅其約且志喜云

一室類蜂房為食來窮山僅救饑火煎跋履恐彫年平
生邱壑念回首魚脫淵鄉居何許佳菰芡滿中田有兒
可耕牧枉滯章句間昨日鵲啁餘鴈書忽墮前云集南
蕩工數竈騰青煙書賣猶可市前功戒頽顛官業詎宜
老倦客志在閑置書命鷓夷心事今泰然

良驥馳康莊驤首輕鞣鞅筋骨倏謝昔得無伏樗想自

審涎顙質蹠蹠欲奚往如我合漁樵奪煬忘幼長資身
本缺如與世志空廣老去僚所安豈直樂榛莽

種禾撫其實即概乃可稀儒吏曹不長竟為老農歸妻
芸兒可犁稱力食且衣平生晞龐翁此意今不違

半生冒吏塵初不一日娛往往清夜夢翛然繫林墟已
辦二頃耕更有三畝居養魚近傳訣種桑不論株呼兒
計曩昔屈信果何如不復首尾畏形泰神裕餘枝筇莎
徑微枕書竹牖虛日用食眠爾外此一事無

我慚曠達人夢寐眷鄉曲十年仕楚越政坐食不足人
皆詫善奕舉世鮮識局陶翁有高躅迷塗炳明燭於焉
稅吾駕作息課昏旭

把竿坐斜陽跨牛出曉陌長謠柴桑詠聊復自適適梓
里三鬴餘鄰犬不吠夕稼穡政使忙樽酒取空隙仙曹
有知友自揣無能役經時雋英事小人分耕績成言君
勿問賣菜可求益

病起四詩

一節食

醫經戒多食書惡殄天物細茹取微足衛生此其術是
銘當七飭况我日衰疾胡為冒所戒一卧復十日恙疴
不虛生一一自口實大嚼健武事欲強蒲柳質行年踰
知命備歷世纖悉山膚與水豢嘗味幾十七婪酣復不
已頤正昧終吉昔人議四凶饕餮乃其一不見辟穀翁
曾是漢良弼

二止酒

少日良束脩但識名教樂誰令憂患後頗復近杯勺
號或跳梁扶攜取諧謔興來偶一適事過含餘作向非
病鼎至或未悟狂藥不知黍麥毒終乃堇葛若腐腸自
浸漸履虺尚歌罟覆觴吾已後遽覺今勝昨此衷天啟
之相予固不薄卒歲辨僧過茗粥安淡泊時醉床頭經
妙意翔碧落

三息念

祿位據極品勲業垂不磨出從白馬肥家有黃金多世

間貴富者才德乃莫過骨相審自知甕盜哀駘他一昔
讀書史志空慕邱軻矻矻章句樂所趣不及他日月倏
遷謝如此定命何知己初不無腰金鳴玉珂一旦逝水
去匪斧嗟不柯揆材既樗櫟揣分合澗邁旌翻火馳餘
但有雙鬢皤迨今要勇往灌園仍養痾石女自無兒古
井那解波西湖佳風煙久矣辦一蓑

四論報

我本扶犁手為儒父兄意全家飽官廩髮膚盡君賜一

念三稽首報荅迄未議向來挹前脩謂可跬步至即今
頻頻食空負堂堂志尚當桑榆收未可弁髦棄柰何不
自愛生理冒所忌致君榮吾親環省已不冀餘年猶視
息舊學有造詣其次在立言揆予敢辟是於世粗有益
就死可無愧嗟將金玉女凜凜戒失墜

題陳主管奧廣樓

卷舒樂天遊仕宦甘吏隱吾宗大雅士為學先究本樓
居盤礴地超然寄妙蘊沉沉一機深納納萬象泯人方

窺端倪我自絕哇吟胡寧山川麗詩卷規束攜彼哉狹
且露之世坐拘窘曹馬登斯樓不博粲然鞮

題雍和堂

元功播萬有洪纖各秀穎一或疵癘之槁乾例榛梗是
身儲至和舉世乏妙領粹然太邱裔父子皆秀整學自
付衣鉢刃不留祭肯文字長少蘇智趣大小耿脩然詩
禮庭翩度脊令影穆穆墳麓春矯矯塵務屏會看蟬媽
去滋味調九鼎彼哉夸毗子肝膽作壺毘斯馬世宗師

胡不日三請

題通明堂

世儒困牆面室外由蔽中一理有朝味八牕自玲瓏公
無末俗病人識古賢風照物鑑絕塵與世雲行空似聞
虛白室略與公心同彼哉壞陂老史語寧所蒙吾知泚
筆意千載端為公

次韻余司理

留襄陽日侍帥論詩
既歸余有詩次韻

一從荆楚役八數昏旦星剗裁有瑣碎觴詠無頻仍世

故未焚券官曹方治經客或嗤臞儒下亦安聾丞過日
念知己遠方空舊朋持斧迺宗匠歎血主文盟天瓢賸
挹注風翼困凌乘袖憐醉墨溜眼為故交青招此窮鄉
吏闖彼小玉京樽罍容吟喙粉黛羅娉盈理窟領新得
詩瓢傾舊盛風前雕虎嘯秋後寒蛩鳴六花嚴堅陣尺
筭麈罷兵是翁信竒偉小子慚奉承攘善悖古訓儻言
防天刑見推無異辭君語吾未憑

離伏龍

北風塵屯雲倦鳥白晝迷節為縣麻雨寒氣晚淒淒何
以贈行客去路一尺泥卒徒淖莫前草棘取新蹊可能
辭滯留十步九顛隳窮我恐非天問子誰見擠少日憂
患海有眉未肯低流年况衰病縱死非孩提戚欣何足
云壽夭久已齊秀色浮嶺路清音淙上溪會心各姿態
將須忘慘悽山靈不無情斬新獻詩題

過八疊山

我從外朝來嶮峭相連接巉絕不可上孰與西八疊車

匪毛羽去我豈猿猱捷一步九頓仆陟起正岌業飛羅
攀恐斷狼石高更躡時方積雨後沒骭泥涉涉客居慣
澤國未到意先懾呀如敵場赴隸卒不敢怯及此問次
舍猶覺口嚅噤剪燭未渠寢尚恐夢驚魘

還家登悔來坡

下坡驕鴈墮上坡風鷓退歷險雖未勢未易忘歎慨散
人吏隱心下上不云悔摩眼見南山衆嶺莫謀大雲陰
巧蔽虧日御頗隔闕誰規山一凹千室作闌闌嵐影暝

竹栢吾廬良好在言歸休吾勞嘯詠山與對

程帥和陶二詩見憶次韻

離合定有數撫事尚忍言憶倚枚鄒袂遊從如兔園堂
堂繡衣老凜凜雲錦篇繫公笑譚爾諷玩良超然效顰
徒區區晞駕嗟無緣登樓漫多感漂泊類仲宣窾石取
供醉孤子真次山東望搔白首不獨悲流年

次程帥和陶詩韻

勉兒子以學
亦公意也

昔吾竊科第正自學力勤雖從士夫後祿已不及親痛

感韋經傳敢忘擇孟鄰念汝知策厲燈夜仍鷄晨立志
忌作輟惜陰計寸分盍抽胸次陳驅為筆底春解顏獻
新得眩眼釋嶠雲鉏頭足膏腴天人巧相因奉親有如
此况予耐賤貧誰今予不如儷美須前人

謝程帥表制使

安撫程丈詩簡不乏近表丈制
帥附寄蜀書五部以把筆已頭

白見書猶眼

明為韻以謝

昔人道與俱物外一不假而我同是見兼取及土苴虛
心超萬境詩筆時一把造詣豈二機此秘知者寡

還山念初願老夫辦一物生平萬金產自託五色筆譬
如十全醫付此無妄疾落紙亂蛇蚓超然百憂失
世人事夸毗失得紛滅起回思少年日失脚幾墮此尚
友千載人得已吾徑已高眠北牕風賢否付一指
俗間苦偏仄有士能湛浮任真自得得與世不同憂得
閒書遮眼覺倦書枕頭不辭蠹魚誚不貽牢豕羞
江左風流人安石頗巨擘絲竹不去耳用逃憂患域陶
琴不須絃我輩所矜式設逢東山翁兕觥與浮白

好書飛墮前客有記衰賤蜀道六十舍汗牛煩軺傳端
如枵腹人品列睨嘉薦常伯古賢風凜凜眼中見

會青媿熊膽入眼冰雪如疎雲放佳月赤青為之除自
拭烏皮几日課蠅頭書政使堂下笑矻矻糟粕餘

豐約自定分絲粟戒妄求斯文寓理窟多取誰汝尤人
間張長公骭麟謝公侯窮塗有樂地投老容夷猶

九死得此生萬事遂成懶惟餘坐進地劣亦受推挽交
遊金玉人畢力補疎短詩書銜矻劑陸續到老眼

一編用劉漢誰似進履生高吟謝世書我嘗羨彌明昭
文倦袖手此曲寧虧成屠龍與避洗付渠自重輕

程帥以詩見慰用韻謝之

平時聯輝星轉首食既月誰能玄覽空影事晚盈缺老
子一掬淚未愁謝天合生世岐高下末路各一穴莊生
悟浮休荀粲枉悲咽公言敬書紳聞道有先達

梁廣文歸自襄陽作古樂章迎之

自君之出矣適我患禍初入門悼今昔顧影憐畸孤古

有鼓盆達自笑食蘖如石交不在眼勝談誰見娛

自君之出矣春意尚妖冶著我愁城中轉首已中夏豈
無鼓吹具塵筆置不把亦欲鞭其慵獨倡無和者

自君之出矣無心惜流光但記燕營巢俄復蜂割房煩
君驗節物可孤北牕涼戎葵一笑粲竹萌十尺強

自君之出矣饑民日北首春從二天來共拜更生手未
議解倒垂促膝此何有非君面揚權誰有筆端口

次韻陸子高

子高歸鄉里去甚匆匆
有詩見贈因次韻留之

一從別君來圓缺幾望舒相與兄弟然異姓殊厥居向
來帆歸船欲去仍趨趨平安可但已擬憑雙鯉魚兩地
邈千里二年能幾書了知故人意記憶猶勤渠當君訪
甓社值我留南徐參辰巧相避終冀或起予扣戶聽刺
啄果爾不作疎屬者久契濶茲焉不躊躇甚欲挽袖留
扣子萬卷儲子家老嗣宗三賦陵相如阿戎青出藍萬
壑赴歸墟宸廷奉大對百韞財一紆有偕仲補袞無取
辛引裾俯視漢諸公彼餒此有餘置之不吾即欲刃捐

磻磻南臺復西掖高位為誰虛未須芹藻地脫口鎗珮
琚平時交遊間別酒慣攬袪如君可畏敬且復同鄉閭
求全待補劓涉險資閑輿滔滔多面朋著眼增歎歎視
我若澆然於君何賴與願言風誼重暇計日月除許尋
十日盟子高初來已
欲作十日留妙論窮終初治具有赤脚抄詩戒
小胥安得方角輪一昔生君車

再次陸子高韻奉寄

言懷
叙別

孰能下書惟潛心如仲舒沒沒視息間飽食仍懷居紛

華或交戰進脩顧趨起屹立視儕輩未脫同隊魚欲耕
我無由生計付束書推卷了無得每嗟吾負渠日月駒
隙過撫事猶姑徐衰晚時用少倖直女罵予拙憐官路
澁貧覺交情踈沈沈王侯宅進步終踟躕所悲名不稱
暇計家無儲一官劣自庇晉如復摧如犁頭足膏澤良
田本榛墟洪鍾忍不扣妙意誰為紆纖缺間衆美狐裘
羔為裾而我空無有一饋九歎除眼中今士龍才業世
舍諸椽筆將精騎詩來真擣虛陳前眩錦繡論報乏瑤

琚應以巴人歌跼踖疑見祛逝將賣書去近君營田閭
更僕懷韋編課兒肩竹輿有志竟未酬南睇幾歛歛愛
我寧惡石非子而誰與江山悵路長冰雪迫歲除臨風
歌歸去平日賦遂初塊處念離索文會思樂胥寄語識
自警僕夫行膏車

感事十詩上李侍郎

齊人石為瓠自視比金璧鑽之不能竅寶此果何益人
士為己學落落肯如石當知井用汲又惡匏不食

客來自羅浮遺我藥如粟茹之三頓首已覺顏如玉飛
浮日月傍夜訪銀河宿和氣均人寰坐使年穀孰

鄰女德稱色婉變白玉溫無資嫁未售行媒不顧門佩
是親紉蘭庭有手植萱君子正求匹不聘甘難婚芳歲
逝不留苦節中彌敦澗潦有遺采此意與誰論

國工鑄良劔髮白心志悴晶熒淬斂餘干莫並犀利入
匣蟄虬龍落手懾魑魅衛身未足道適用在一試樓蘭
猶頡頏顧汝豈虛器

荆璞自楚寶顧終雜土木和氏浪三獻一身已再辱小
儒褐衣底磊落幾荆玉把玩坐蓬屋和應笑遺俗善價
誰不懷一辱詎可贖吾亦笑和氏葵猶衛其足

伯夷困采薇名不廁周亂敬通可言命四七拱炎漢聖
主方側席士或槃邁澗有斧苦無柯古今同此嘆大人
世鳳麟吐握豈云憚么麼未足數一官從浪漫

長松倚絕壑高蘿纏綿之蒼山屹半空白雲相因依揮
策馬不前自問此何時聖賢運化樞竒髦各騫馳躑躅

諸儒後槁暴窮山為槃木貴有因平心勿嗟咨

燕君市駿心一昔馳九野豈知千里足近出鹽車下臨
風非一鳴幾謂無識者詳肉略之骨曠古無善馬

枉尋固已汙索價則已欺人生功名念舒卷自一時榮
辱取所適窮達非敢知及物儻在道卑官亦可為咄咄
厭矮屋心無一日嬉還應乘田翁笑汝太矜持

幽人一床書不肯晚侯伯領會有真樂未厭四立壁平
日太元經看人五鹿客今代元紫芝獨未覘顏色向來

縈清夢，喜得親炙。一洗衰俗，耻滿腹。志願畢。

隱靜道中

晴日暝復出，煙雲尚飛浮。東風解人意，松間作颼颼。罷馬不用鞭，正愜道塗脩。涼氣濯毛骨，百疾洒然瘳。縈紆草根泉，激激冰玉漱。籬頭薔薇花，娜娜新婦頭。空林人語寂，野鳥時啁啾。名山無窘步，春色况未休。盤礴翠微寺，判作三日留。曾非耽禪寂，聊此樂深幽。文移暫見貫，清境與心謀。啼髮五峰影，濯足雙澗流。

同陳宰黃簿游靈山八首宰云吾輩可謂忙裏

偷閑苦中作樂以八字為韻

浮天大江白發地羣山蒼江山環挹處一鷺棲寶坊偶
從紅塵中與客分僧牀却窺紅塵底紛作磨蟻忙

精廬兩牛鳴欲往輒復止山靈應笑人矻矻簿書裏清
辰陪詩翁俗態方一洗但恐煩移文松檜負餘耻

令尹拯濟功在處騰歌謳翛然伊洛意副此招提游一
笑空惚餘政以先民憂雖懷蔡侯靜不作趙孟偷

我雖裹章服雅意耕寬閑著貂可採藥拄笏或看山白
頭敲榜地茲游破天慳有興聊可歌睡語不受刪

枕流未云清食藥不言苦老禪家翠微風壑嘯一虎碧
眼照人天金地漂花雨千偈彈指頃竟亦無剩語

名山吾敢忘獨往興易窮勝游得勝士杖屨凜生風表
表益者友當求古人中今世習鑿齒前身黃石公

一代無為翁雅志屬邱壑至今玉雪句為山鎮不若生
平稽生龍何時令威鶴弔古但三歎九原如可作

吾儕自由身聲利為纏索不有山林幽何以寬此縛熏
爐仍茗椀鉤窓共盤礴何必覩史天是中差可樂

郡寮按樂飲趙判院有詩次其韻

簿書禁如絲取樂得少空悠然杯勺興藉此歌舞送從
事來官厨醉不睡鄰甕衣裳賸蘭澤言議雜囂閔人生

醒忌獨勝日飲須痛向來講上鷹府公解其縱

僉判司
理稟樞

相許之
方作會先生作禪卧肯以靜啞動形臞詩則昌萬境供

日用文字與紅裙寧非一理共退之強分別無乃夢中

夢絲竹娛中年耐此髮種種明當解予醒酒德賡舊頌
再過楊秀才莊

游茨竹間見竹根漱清流儵然楊子宅面勢崇山陬開
窓得小憩忽復成再游流光屬深省昔扇今駝裘主人
中田宿猶事方未休磨門紫蘭兒見客頗邀留鷄黍要
後約行止寧前謀攬轡茗事已黃塵迷馬頭

江湖長翁集卷四

欽定四庫全書

集部

江湖長翁集卷

六

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣龔輝遠

欽定四庫全書

江湖長翁集卷五

宋 陳造 撰

五言古詩

張秀才復留為作

郵城望繁川渺莽天一陬親知非不多噬肯一來游張
侯我石友前輩放一頭逃俗火避濕赴義鷹辭鞫窮谷
喜足音况接大雅流前之翩然來今復欣然留茲非為
我歟厚意胡宜疇日邊有知己崇論親冕旒故人書杳

來擁麾淮上州置彼肯就此與世風馬牛文字有至味
過從無珍羞山院作僧過竹靜荷氣浮載下東野拜幸
貸別離憂從渠夸毘子見謂君何求

次韻臧秀才讀蘇集

秀才甚文
予未識也

自我得蘇集玩閱幾忘年汲甘乏脩綆適遠疲短牽取
一九不隨望若終茫然子齒始半我用志超我先晶熒
出秀句妙斲遺雕鐫此翁深堂奧駢闐誰敢專潢汙置
不云學海須百川怪子介且方落筆盤走圓子真蘇門

徒豈獨長短篇平生脩月手不補衣履穿秦黃晁張陳
衆星耿霜天世儒昂其首指似如登仙子起斯人後遊
刃牛無全邢娥望可知衆女空丹鈿何時班荆地解我
心懸懸即今清夜夢不止懷昔賢

送臧子與子儀之楚州告免解二首

二臧如靜女不受朱粉加尹姬望邢娥宜著帝者家向
來揚蛾眉衆喙怒以呀指玉謝堅潔擘肌起疵瑕去汝
忽若蛻人與室俱遐玉臺鏡如月滿意事鈿華九重訪

娟麗萬目看嫖娼當使听听者昂首七香車

昭代論豪傑崔侯允武文小却折遐衝厚用當致君敷
政極中和殖學根典墳士有砮玉岐公自涇渭分何人
非教育二臧實不羣兩兩計偕去名猶壅上聞試袖于
為歌往拜劉將軍心醉公瑾前何待麴蘖醺

寄陳用晦四首

時陳對
移蕪湖

昭代儒者尊青雲坦脩塗即今子陳子尚歌于為于滿
歲不自保爾俗苦好誣向來撫字工督課有不如

百謫孟公達三紉柳下直令君向于湖頗帶遷逐色府
公酷好賢要試心鐵石此學祇現前嗟傷定何益

詩翁磊塊胸大邑佳麗地瓊也領螭蟻懿也目秋水清
歌醕碧筍粗足令公喜醉呼翩欲仙誰要卿料理

我初識蘇仙談詩達旦夕君今與提衡當復詫此客一

代紫微公文采耀楚澤歸來要同登斲句慰英魄

歸來
張安

國堂
名

次俞簿韻

棋於俞家愛小荷併
以長句分惠作此

昔賢識紫芝不恨生叔季同寮得若人襟宇極冲粹相
過鄙吝忘滿抱昔賢意傍睨襤襪兒真堪裂人皆棋枰
消暇日竹軒陰踈翠不作沮洳臨纖鈎笑侯喜愛此小
泓渟歷亂青鈿委大篇副么荷乞一仍得二政須傳生
徒未暇藏篋笥辭源深莫窮歸牛定浮鼻紫芝不詩鳴
較君同而異游藝復友賢老懷隨所寄莫嗤學夾秋更
想鴻鵠至

檢旱望磕山

長塗並江沙我行頗寂寥登高望西南羣山如湧潮崩
騰勢相排又如羣馬驕磕山乃孤峙坐受羣山朝雲斜
復煙橫助爾干碧霄虛氣信所聚神物不汝遙有龍窟
其趾貝珠麗宮醮豐凶執其柄禱禮走黎苗胡為今茲
旱不能澤枯焦史巫歲紛若無乃徒囂囂奔馳吾得辭
未救民腹枵問龍當厚顏深池卧逍遙

三山磯

江頭數羣山駢蹤各崢嶸茲山挺秀出乃以三山名三

山戟拔立離合煙雲橫巨麓截水出石轉為微行倒影
射江北陰森如未晴盤渦觸岸去勢若蛟龍爭狹岸東
洪流突起不平舟楫復往來立者膽為驚

謝宋宰惠玉友麴方

夫子如周郎即之疑飲醇相從不踰歲遽欲瀟湘秦此
生憂患餘飲助嗟無幾安得如公者莫逆與終始麴生
到我室奠贄心已傾醞藉非俗輩面作玉雪明挹彼醇
厚資春意生戶牖非公介其間未易交此友此友仙者

流勿藥氣自和

此方不用藥

著我無何鄉顧能蠲積痾月團

信佳人業工敗人意使我百慮攻愁城不餘地雖無叔
夜書泛交方自訟平生一鮑子世莫知管仲悠然甘不
懷交道自久長因渠念公他端人更難忘

病起閑步

青女橫侵鬢詎堪連日飲黃媪不克家倏伏半月枕陰
陽有酣戰藥劑闕上品衛生忘周防內愧每流瀆今朝
步崇岡晴日貸餘凜江波縠動鏡嶺雪印塗廩竹間小

梅花幽香到襟袵去春無幾日鳥哢如見諗酒瓢隨短
轅舊盟聊復寢詩句疇物華是口不容噤

示師文

時在當塗

樸樾已非材骭髒遽成翁生無適時具何向不塗窮賴
結文字緣人士飽過從三年尉山邑趣操有同風博古
得二臧秀發仍兩鍾蔣侯厚本學落筆語更工我卜當
塗居薪米耐闕供從渠得琢磨遺汝不已豐士生在知
道寡陋難言功會理貴博觀受物由虛中潢汙不揚漪

大江日傾東，遲汝草靈光。一觴壽乃公。

辛丑春雪甚意有感

歲序各司存，雪神庀厥終。度臘不成白，接春吹旱風。井
脉青煙起，地毛黃埃蒙。東君借一怒，六合玄雲同。玉龍
專獨夜，紆帶縞長空。破曉歟三尺，山川積蘇中。宿麥賴
一溉，園林潛動容。繫此玄冥事，春皇豈能功。瘵官可辭
責，代庖容非恭。風霜與暘雨，不時皆沴零。即今雪擅春，
何異雷鳴冬。方蘄焦槁息，未暇尤化工。緬懷虞周下賢。

哲多不逢權柄在掌握秦越眎困窮變故方沸渭頃刻
分吉凶君子諉不謀或非世用充當知寸有長琤琤即
疇庸鮒也胗土苴顧能魯使東鳶肩既歐刀五孺各疏
封融約漫百數不當劉係宗稊稗實枵腹常以歲不豐
竒疾待烏喙參朮渠能攻高位有不稱坐令虵為龍快
意雖目前道揆終厖茸惟昔道興世聖賢啟泰通元凱
森帝庭十亂拱法宮盡屏欺負徒鯀兜變夷戎此人如
此雪胡寧久長雄小乖見覲期適貽吾民痾仰天欲三

歎義馭暎朝紅

荅毛叔子

章甫不價越澣洗或彊吳事以適時重投暗恐類愚毛
子抱高學眇睨大小儒過閱幾公卿攜文及吾廬我窮
劣識字三讀起長吁妙處未遽了君意無乃孤勸子俛
從俗青紫摘頷須他時不朽託一一世楷模

有歎

應事如應敵收功端有素詩乃隨景遷預計幾膠柱鼓

吹月明秋當時亦佳句見卯求時夜竟為陰雲妬想像
斲為工故智那用據向來東遊意夢境騷人賦出郭帶
月行過山衝雪去風力馬欲卻寒氣鳥不度舊擬忽新
偶自笑邯鄲步與世甘數竒失意資一悟覆卻從萬方
脩然隨所遇吟情形前影塵事風外絮

次前韻

郊原二月天節物屬丹素山風歛雪花野屋欲冰柱破
除酒邊興截斷口前句誰將萬玉妃一一事嬌妬東皇

不無情退縮自失據史君文章家客子舊能賦茲游豈
偶然擬作袖手去江梅孤舊約桃花帳前度漂忽幾何
時林影映沙步層雲放皦日瑩澈等僧悟一笑百慮餘
如世有晚遇預知詩及門新語謝鹽絮

王潛小燕玻璃分韻得路字

去年客京華酷暑不可度時為冷泉登稅駕脫巾屨風
外雜佩鳴松根一竇注可聞不可挹已足盪袪暑竭來
黃埃中夢遶湖西路寧知虎頭側碧溜依紺宇瑩淙響

琴筑噴噴起霏霧餘潤碧苔滋照影紅葵嫵涼氣濯毛
骨寒聲到樽俎况陪持斧翁觴詠澣塵慮坐著錦囊生
歌煩桃葉女向來湖西亭聽泉渠須數逼人灑清寒如
翁玉雪句更喚泉間龍為霖下山去

是日小
雨愆期

送李監獄二首

蓋從周信
道學詩者

李侯西州英早著武士冠竭來淮上郡鷄羣見翠鸞清
詩萬卷餘脫手走銅丸初聽耳目醒再讀毛骨寒解榻
一甌茗敢作麤官看今者連日語袞袞為發難中年可

堪別別君倍悲酸書來有新句政用驅愁端

寥寥黃陳後詩律日就卑京江一燈續天乃不慙遺念
君從之遊十年墮應箎盡渠磋磨巧况君粹美資奪標
快一得不計弟子師向來誦新作格力欲並馳扃戶玩
明月寒餓用一岐及今辨一飽無取空名垂

次韻王漕燕玻璃

輕颺度翠密碧溜下峻嶒飲處凌埃壒談閒忘鬱蒸何
物辟塵犀墮我玉井冰落手錦繡段酬贈慙未能

題五柳先生詩編年後二首

淵明英傑氣不減運甕翁漫仕徑拂衣高枕北窓風平
生經世意蕭然詩卷中卯金納大麓正自竊鉄雄妖雛
自取死遽敢貪天功斯文未斷喪吾道聊污隆把菊得
沉醉直氣斂長虹區區記隱德史筆殊未公

邸報議麟經卜書目羲易曲學暫霽曠日月豈終蝕陶
翁詩百篇優造雅頌域九原不容作妙意渠能測今君
語析塵指示了皂白定知此筆人斜川舊仙伯毫釐無

餘蘊領覽飽新得言下悟未師吟邊識圓澤

次章房陵韻四首

老驥挺高骨彌耳塵中馳鄰女嫁不售泣向流黃機與
子落窮山坐無適時姿濠梁莞一笑遊鱗噉風漪

詩法究源委今古有正傳寥寥風騷後誰定執此權杜
韓到黃陳刃藏牛無全愧我蝨負山良夜卓兩肩

章子五車讀詩外未一施清篇忽見屬了不計吾誰投
暗率如此世路宜暮遲獨無牙曠手並坐絃君詩

詩社有血指鉞刀齒魚腸橫江限一鎖未易枝龍驤山
澤護我瑕珠璧耀我箱勝譚當不遺茗果秋夜長

再次韻

咄咄嗟數竒覩覩笑坐馳超然達觀士顯晦用一機夫
君抱器業軒豁見竒姿付我舟一葉緡絲漾清漪

覆觴課五升秘訣不待傳百里三萬家優主師帥權坐
肉荒歲骨豈但醫十全高郎徑刺史况論擔弛肩

世人競捧心妍醜西東施揮斤得妙質捨子吾從誰所

惜憂患餘歸計不暇遲繼今省幽獨鴈足時新詩
平日四方念見謂石作腸即今還家夢絆驥首屢驪不
作垂橐歎藏書頗青箱此燈可無傳兒孫共翁長

次韻梁教章宰喜雪

袖手飛雪前徒有風雅渴久親無言子此興今莫遏兩
君壯藻思詩柄專殺活可須龍伯睡驪珠乃平奪長翁
久荒廢坐受兒女聒愁城正合圍醉鄉况禁謁詩來起
我敬一嫡眇衆孽此雪更此詩清晤乃細閱晶熒盤走

圓便旋玉為屑汎掃無惡氛肯綮有妙割解頤得匡鼎
和羹本商說技癢吐復吞正恐誚燕說山城僧舍似休
務况佳節可踈觸寒過一笑卷蕉葉作詩供捧腹巴唱
酬白雪

再次韻

窮臘缺膏潤何異客病渴龍伯供雪事落勢不受過續
紛一再餘旋報焦卷活去年痛無年回首氣尚奪流亡
何紛紛哀訴良聒聒為民倒陳紅擬效叫闈謁繡衣肉

骨手大帚掃妖孽貸金今可償復許歲再閱秦越作肥
瘠德人終不屑協氣非挽回何以救方割想聞三白訊
把酒顏為說嗣歲屈指計老農聚頭說團欒飽餅飪市
鬻追時節忍思狼狽初草木茹根葉苦樂倚伏間此耻
幸一雪

再次韻

平時豪飲興人議老羌渴駭蹄就康莊中有谿澗過俛
仰三十年僅作扶病活樂事生無幾造物忍見奪謝安

晚多感正賴簫鼓聒胡姬賣酒地緬想不容謁即今少年夢尚苦法士孽兩君詩酒豪將壇最闕閱左顧得投轄勝譚看吐屑雪天僕為更盤飯鮮粗割共憐后山窮塊處但禪說一飽共此客矜向鄰里說問疾不厭頻他費尚可節官塗計離合江海浮一葉別期後歸燕光陰等消雪

遣興次前韻

斫水蘄斷流捨鹽寧療渴區區守荒學籠鳥眩樊遏向

來麋鹿姿祗可樵牧活始其事誦數魄似窮鬼奪文字
取憎疾見謂蝸蟾聒回首輩行人班劍或朝謁方嗟沈
帶減正坐河魚孽分無青雲上但有枯策閱峩峩指頂
地羣口免騷屑醪敷兒為供蜜脾手親割敝帚非世用
槁梧取已說非君莫逆者此懷誰與說反求每自誑百
行收一節西來傾藁冊又滿三百葉暮年了無得付子
鏡中雪

雪再次韻

卑官望雪心有賦繼夢渴旱氣方兆朕造物工式遏山
城窮陋地民以年麥活即今稼事寶趙壁還秦奪忽訝
天雲近旋遭鳥烏聒豐年得竒識賀詩筵佳謁了知叶
氣熏人定銷天孽老眼眩鹽絮已不啻三閱辦香為神
報無乃笑瑣屑絕望羔酒醉作意鷺股割賞雪須佳客
生恐無此說來年當更好可但老農說來春還家吟要
使君擊節今朝泚筆否浩蕩對雲葉儻肯躡凌兢黍枕
更一雪

雪夜與師是棋次前韻

投醪士或醉說梅人不渴窮途餘樂事不受憂患過詩
可供呻吟棋亦識死活朝來喜雪句神藥胎可奪一枰
與兒晤斷無市聲聒既免沈舟諼不作賭墅謁指冷良
易忍眼花苦為孽疏置仍作罪隨意略細閱瓜葛勝負
間時亦近屑屑策幾竒兵鏖地比弱王割吾非江左管
舐犢愈愛說升沈作豐悴今古無成說家居鼓吹具藉
以保晚節掀髯得一笑為汝倒蕉葉袖手聽殘更紅鱗

曠晴雪

再次韻作招隱篇

我家五畝園泉細地不渴載酒啞肯遊開門誰汝過典
衣買花栽種十八九活繁華出荒穢天巧容人奪三徑
紆曉步兩部厭晴晤長日岸幘嘯看人曳裾謁伸屈較
倚伏烜赫藏戾孽蠻觸勝負間吾老飽所閱孰知花藥
疇細炷沈檀屑此樂彼莫顧渠愛我已割微吟會心處
山鳥亦欣說焉得喙三尺佳處為君說穠蘭媚幽芳野

竹挺高節當知陶一觴可敵簫八葉駢來作螟羸獨立
耿玉雪

再次韻

雪應時可喜晴不遲尤
可喜雪止恰除夜因作

人間十日雪已潤夸父渴宿雲忽披靡羲馭與抑遏春
從九地回旋放牙甲活主張披拂是大塊司予奪椒栢
追時序鼓吹聽曉聒詩壇有同盟辦作銜袖謁得雪晴
更佳過是或為孽羣山半披剝衆巧獻一閱懸知兵吏
集不待鋪木屑令尹活人手小試牛刀割廣文甘僻左

不肯事容說與俗分樂事盡以韻語說獨慙長鬚送不
量好時節

六一謂聖俞曰山婦云好時好節
送詩攪人家不知吾輩所樂在此

要須百篇

富趁此梅未葉正使領兒觥快作湯沃雪

再次韻

廣文欲出逐使車作詩挽留少俟燈夕
後予作漁家傲舞隊欲燈夕小試云

傳聞使者心急士幾忍渴廣文馬已秣勢似不宜過長
翁仕窮山離索幾苟活藉君忘幽獨長恐有力奪勸其
少徐之無謂險膚聒吾儕冷如水雖坐慵造謁渠儂夏
畦譏火馳自生孽山城燈火夜而况已再閱佳人參辟

辰俗子眼中屑一笑待休沐官事罷割割期喪近絲竹
憂患偷偷說古人惜中年吾請用此說為君枝病軀偕
我酬令節捐金裝玉梅艤楫命桃葉舊曲迄末試把盃
看翻雪

贈章宰

章三月二十八日偕客燕湯池雨不可
往勸其飲于家送九室井白酒佐樽因

贈以古詩十七日偕予勸農房山是日亦大
風雨所阻登眺興事不如人意往往如此詩
之作道
此也

湯池豬巉巖房祠踞穹隆向來偕君西寒雨斜驚風虛

簷吞山川恍若困樊籠往來三十里兀兀婦車中頸方
學縮斃眼不到飛鴻迄今簿領前老面潮羞紅昨夕縣
麻勢子亦胡能東如子亭衢人不應分我窮山靈兩介
士不屑陵原通我輩吏塵浣椳觸肯見容高興未渠盡
佳節寧易逢調琴家治具竹堂小窓櫳酬酢十客優庖
隸良易供登山與聽雨取醉政自同玉友陪從事共達
吾深衷逮今彊健時數近玻瓈鍾丹杏正媚嫵柳枝頗
昌丰古今共陳迹春事尚怱怱此歡不可失此言儻見

從對花但忍渴請看哀病翁

再次韻

予與章宰前後為干野之行皆以雨止因作古風道之初一日寒食遽晴來日

排日溪邊領客為上巳燕是日宰和章見貺復次韻道喜歡意

谷巖蟄石燕帝闕鎖豐隆入懷疑有無愜此靡微風晴
空寄望眼已快鶴出籠向來陰雨餘缺然賢聖中庭竹
忽乾鵲雲衢亦輕鴻新詩照老眼姍姍欺羣紅飛僊款
幽寂珩璜韻丁東稠疊挹勝槩孰謂吾天窮花神憐客
心密密靈犀通冗官况暇豫令節聊從容少徐泛觴醉

或有解佩逢傾城試新粧戶戶虛簾櫳未用椽筆飛坐
說十吏供樂事易陳迹此歎今古同當時序蘭亭一一
言由衷嘉會青帝惜芳情吾輩鍾繁香與麗人相映媚
以丰滌酒勸羲馭西去忍匆匆遲暮冀如願百違今一
從瀾翻笑譚口幾成咕嚕翁

呈交代

雨中至蘭若交代置酒
雨尋止來早安行而北

雨行不轉首豈即真良圖二年望鄉國得歸不暇徐徒
隸悉此意頗作竭蹶趨衝泥傍險地亦復歌載塗使君

卓旌旆小燕留僧居一盃酌龍公庶或輔相予捧觴未
一再霽色明桑榆安寢俟清曉辦裝無滯濡有禱必其
應顯幽無乃拘夸詞諱天幸此理良自誣

至喜鋪

外朝走馬息險絕欲無路馭駿蹙萬蹄勢若敵場赴崩
騰臨空曠踠足此小駐蕭然一驛傍為此數家聚川城
南山下邑屋隨指顧行人不勝喜息駕始此處茫然愀
然意南北分來去我解房州印初試歷險步胡為亦自

得不作罷爾慮鄉心
建瓴水歸夢受風絮
殘年歸來引他日
遂初賦是役固已勞
端復酬夙素
臨風搔白首
一笑飭徒御

報恩方丈小憩二首

還家自欣然
小耐孥輩累
老禪遽辟席
倦客容即次
仍將寒碧供
為澣羈寓意
斷續饑龍吟
煜燿金鎖碎
石鼎無幾然
團蒲有餘藉
山嵐變寒涼
更挾清露下
月榦澹疎櫺
風枝語良夜
為君賦招隱
自剔篝燈地

十詩謝廖計使

以後山詩何以報嘉
惠江湖永相忘為韻

二年仕窮山書外睡作魔
吹律黍為茁賴公有孰何懸
知登門初大宅浮陽和泛愛
公自爾小子何足多

平生書成癡初不冀料理頽
齡迫肺病課此未云已屠
龍詫流俗祿邀欲何以閉目
耐昏花三歎仍啟齒

繡衣蓋代公學力闖天造千
篇發幽秘萬物困陵鷺攬
收盡隨和吾富無乃暴小試
推敲手聊效桃李報

偃佺地上仙笙鶴不我遐楚
騷欲命僕古詩無名家晉

當澤帝範小却侈國華本末計中外倚須拜亨嘉

我生守荒學意造無根蒂時時寫所蘊致遠終恐泥小
勞斲鼻巧霜風掃氛翳一言可終身萬金寧良惠

深井無淺汲洪鍾須妙撞揆公取士心海若吞湖江泓
涵老昌黎客或隴頭瀧可待函丈扣此心久已降

古今國士遇揆我不盡無頑鍾未容器巧匠徒為模即
今鷄書上逮此鶴髮餘但恐良夜夢翩翹只江湖

陸子木已拱遺文空雋永鄭子為米仕縣廨簿領聽

公譚舊社文陳鶯鶴整離索我若斯胡術謝榛梗
欲留苦滯淫欲去復彷徨卧漳仍登龍兩心正交相粲
粲金玉人納納錦繡腸安得雲隨龍意行即公傍
貧女信難昏俗子每易忘文學公世師一見遽倒囊願
公出調燮容我濯滄浪台躔五雲處浩歌長相望

涑口守風

辦舟留襄陽辟風泊涑口得行秋甲辰初到夏癸酉跛
鼈已自慣束髮至衰朽坐是冥得喪况復多病後絕憐

操舟兒不惜脫頰手顧瞻峴山亭覲面可奪取微風吹
薄暮霽景掛高柳涼月欲略箕陰氛尚侵斗明朝起柂
計未敢決可否身已不藉在心自無何有一事萌一意
但見掣君肘擁書坐蓬窻醉我不以酒

買薤

平日屠門嚼因病不敢縱園翁富薤畦尚可羞此供長
白連嫩葉雅稱鹽醢共暖鬲號多益斷下仍百中醫經
備收錄詩老屢吟諷韭齋葵作菹未覺取世重鷄壅謝

稱帝杞菊第賓從佐我炊玉飽食指免輕動歸計三徑
成少辦百本種指日筋骨強報汝當抱瓮

渡揚子

王其姓者助扶拖安
然已濟喜而有作

濤江吞天去委此舟一葉前之恃勇往微命幾顛踣弱
纜維復解宿浪俄妥帖北風不滿帆晴空欲凌躡淮人
鄉情重相為細扶楫浮玉瞥眼過笑譚得利涉窮塗有
快意十北收一捷龍公不常喜未用輕吾怯

赤口灘

漢江多惡灘赤口乃其最前年將家上正值江流殺奔
街震溝畎狼石森戟鏃鼎屨取進寸一跌尋丈退聞此
尚痛定躬履况兒輩今者劈箭去未覺有湍滙一雨動
三日遠岸卷澎湃向者險巖地了不經眼界三老笑相
語無復憂滯礙路可屈指計歸將平心待窮塗偶快意
此惠莫謀大龍公本何心賤子多感慨

鴈汭東守風四首

枉渚八日留池口百里近東風翻白波寸步不容進如

許天吳怒頗訝地軸震崩騰雪山飛膽掉老眼暈豈惟
佐豪吟更覺蘇宿疾還家可指日去意復小靳遺體泰
山重曹敢諉忠信流坎隨所遇遲速吾不問

蓬窓隔世塵但有書滿床度日無與虞日課一指彊坐
免鶩鴈眊自詫肝肺香奔驥踠足意翛然吾自忘賢否
岐非是狗已乃所望温故饜新得但覺此味長晚來砲
車雲翻空更漂揚吾書未渠盡更借燈燭光

驚糜碭洪浸何人矢麗龜遂令老病叟珍毳及晚炊野

鹿敢伯仲江鱖讓甘肥
淮人篤鄉義賤乞等菲
葵向來無人境沙漫水無涯
市聲不到耳艾葦相因依
今無暴客虞解衣候朝曦
厚味真過矣安食如含飴

東趣長風沙移拖取空隙
波頭蟄飛雪幸矣不數刻
連延百家聚俯瞰白沙磧
賣餅售鰕菜傍舡忽絡繹
矧聞淮南音眼中便鄉國
田翁顏甚溫村酒釀堪喫
突兀戎官廨戶柱相映赤
頗喜霜夜眠更鼓聽歷歷

泊戎廨前
無盜賊憂

題解禹玉文卷後

平生解公子器質美無度長加進學鞭猶後趣時步充
腸筮澤書脫手彈丸句儕輩無爭衡儒先有延譽豈應
如老夫嘖嘖聲不遇表表蠹齋翁容易九原去石交不
在眼賴子慰遲暮新文爛錦繡夫我何足赴凜凜傳遠
計堂堂濟世具葆愛今其時自視要嬰孺白璧不受塵
素絲易成汙母為樗木散寧作鐵硯鑄良晨有逢年逸
足看取路吾言信惡石敢謂愛莫助

贈廣教主人

留子飯為胗脉決疑約翌日再同
拉客客不能往而止作詩諗之

七年走薄宦重放湖上步偕客憇鷺峰訪僧得龍樹瘦
骨書作崇餘年藥為助君技信精微我疾判疑誤多謝
辦再往一飽許復具意偶俗物敗行非山靈沮定貽高
人笑竟墮塵事汗似聞今參寥近在西林住擬掇茗果
供飽玩玉雪句勝踐後五日盟兼諭鷗鷺

次前韻

風雨破十九可得閑餘步畫舫連千百排揆隄側樹湖
山墮空濛於客信非助前朝冒雨還正為初日誤今者

乘興往不暇家治具賞心有新愜行計無舊沮香塵紛
羅綺隱服耐此污鶯花殊未厭烏兔渠小住愛日擬秉
燭把酒先得句上馬一回首前灘下白鷺

清明西湖再次韻

蘇公舊隄東增築更千步右為縈回溪夾以葱青樹晴
湖映碧山詩客獨多助醉鄉赴新約書癡悔前誤況此
好清明酒果隨意具向來計追歡幾為陰雨沮今者成
清遊仍免俗子污斜陽不無情似戀花柳住春光念報

荅襍牋須好句此筆付此人遊客半鴛鴦

假日朝士
多在湖上

江湖長翁集卷五

欽定四庫全書

江湖長翁集卷六

宋 陳造 撰

五言古詩

四言附

旅館三適

予以病愈不食麪此所嗜也以米蘖代之且宜燒猪客有惠清白堂酒者

同時饗作
三詩識之

厥初木禾種移殖雲水鄉粉之且縷之一縷百尺彊勻
細鹽吐緒潔潤鶯截肪吳儂方法殊楚產可倚墻嗟此
玉食品納我蔬菽腸七筋動輒空滑膩仍甘芳豈惟僕

養餌政復奴枕椰卽今弗洎感頗思奉君王

雋永項上臠紅嫩劣帶脊彼美大欄君坐受羣毛朝鼎
涪走真味正籍松炬燒芼我銀絲窩葱豉巧和調堇塗
非所宜淑郁如蘭椒腹腴但下隸羶根合藤條併填長
翁腹未覺喉牙搖但訝大嚼餘無補詩腸朽

佳齋肯見分春意偕客至誰將清白名言代碧香謚起
瀹饒磁甌玩吮色香味醍醐馥牙頰沆瀣沃肺胃桑落
古宜城不足偕品第我病久不飲此日欲小醉快哉羈

寓中乃遣拜嘉惠一盃先晨飯歛作凌雲意米飯薦燒
豬佳此三者備飽足仍酣醺眇睨人間世

官務

磨陀為官多曉了未更歷今世從仕者萬口用一律文
按日從事鴈鶩竊投隙自謀脫悔吝初肯計易劇追逮
有踵接符牒動山積豈念南畝民晷刻校日力停犁聽
上命質衣供旅食誰定老我師黠民幾鬼蜮締彼刀筆
吏表裏肆狙慝柰何食肉人立說與推激此論儻不破

此弊終未息揆予閱世熟敢此論在職

犇牛堰

挽舟下犇牛挽丁已疲極長街此埭東街心齒砂礫千
指取寸進顛顛山可拆舟子提肺肝舟材寧鐵石即今
揚塵處劣計三百尺時賢或興懷僅費十夫力往來日
幾舟孰者違此厄為人計安便作吏戒徒食斯人仍斯
患胡必須目擊猶為埭兵地吾言竟何益

呂城堰

堰西綠泱泱堰東已膠盃呂城校犇牛客舟更遲回嗟
我為貧仕此路幾往來厲翁市冠師與我熟追陪渠貧
安無求我困坐不才三別二十年鬢髮各摧頽擬賡北
山杞倏笑南柯槐惟翁未厭客望影笑口開生得數會
面升沈何有哉相約飽飯過世事付飛埃

命書

命書唐濫觴委源傳呂後有倡莫為遏波蕩今不救字
育叵數計八字詎所囿甲子動垓億舉一百萬漏荒唐

無稽据誦言指休咎柰何聰達人頗復安此謬懷刺曳
長裾偃蹇文士右夸詡走干謁薦墨不待叩士有待濡
沫百請不一售我昔遊江淮知識間新舊文士不到眼
此輩日交筮辭章輕盃水羨彼行橐富鯁鯁問利祿吾
儒所深陋自笑與世違迂論取排詬

正學

政術自學術君子惡其欺道學不容偽世以偽用之向
來濂溪翁粹然時所師光風與霽月取重前輩詞兩程

從之遊流變已受疑應世頗拘謏自立如矜持何人傳
其粗矯訐取世資口中誠敬語倚袂挹惠夷其行則市
井跂僑差所為危坐悄長默覆此庸蚩蚩經正盛時事
怪女尚抵巇秉畀幸一旦嘉穀去稗稊正士鴛鴻集古
學星日垂江湖隱淪客有見真管窺爾輩受排根似亦
無子遺得無竒英士失脚遂磷緇用過賢用功取璧忘
小疵願引杖拭手免興失時悲願分斗升祿少救併日
饑闕以周孔塗正以孟韓規嵬瑣審辟就壽張慙昨非

六通而四達恢若隆古時治道貴去甚世變須防微吾
言或可錄敢用告採詩

財昏

師昏古所辭財昏今不耻傳祀合二姓古者貴由禮四
德五可外貨賄亦末爾民風日就頹捨此爭校彼媒氏
未到眼聘資問有幾傾篋指金錢交券奪租米東家女
未筭儀矩無可紀已聞歸有日資送耀鄰里西家女三
十閉戶事麻桌四壁漏風霜行媒無留趾坐貧失行期

趣富曹貪鄙流弊例不免其源實此起多約或少酬暫
譽甘長毀坐令親舊歡詭譎變狐鬼何況性習間貧富
岐臧否土俗未易挽人情大不媿悠悠何足道吾以論
君子

聽政

為政貴中和徇古無取無心斯善應奸譽乃其蠹柰
何聞見間往往用心誤扶弱抑其彊古或垂此譽世異
俗且殊處今猶徇故曲直本不昧彊弱豈所據君子不

此恤情偽溷丹素富室被剥腴日有貧窶慮士夫受加
陵悔不齒編戶羸弊取必勝玉色吞氣去不知世關
如母子所怙不知意定向未語機已露傳繼用一律抱
冤莫赴愬用是致和氣南首問燕路

錢弊

為家重墻垣為民須貨殖揚廬國北戶東南賴控扼淮
民魚米餘百貨仰殊域用銅防外泄用鐵乃奇畫一利
伏一弊救弊要得策持貨貿官券捨此莫衣食錢貸天

下用鐵乃限南北坐令兩淮民塊處斷貿易計鐵取券
直十纜收六七朝賢愛淮民此困盍矜恤銅鐵均國寶
通變豈無術近甸視遠地未可岐畛域况今苦倒垂倚
待振焚溺緣江八郡爾雜用顧何失官券朝北來淮俗
暮安宅即今私鑄斷胡尚膠今昔吾貧復淮人計勢不
容默

次韻林郎中相送北歸

銖兩作低昂舉世皆此心羨君松栢操不受霜雪侵向

來車笠誓歲寒迄能尋骭麟吾何取振拔意彌深天才
有賢否宦路岐昇沈昂貴聽新渥疊來當好音我草賀
緘處碧溪映青林祝公小婆婆未宜輕分陰

次韻楊宰

淮俗日就薄識者頗借憂天變不徒然旱暵將誰尤日
來聞見同比屋聲悲愀令君不鄙夷足馬走道周似聞
隣隴間蟄蟄霰雨稠課功撲燎餘準粟秉庾收一斲迺
百孳阜堅肥螟蟲服勞豈容已善後良未謀即君論才

諳為邦似求由佩蘭扈玄離所向多暗投世賢劉係宗
芥視東家邱方將解倒垂未遑賦歸休橫前觴深淵君
其萬斛舟願天開老眼一雨洗歎愁旄倪飫菽粟羈罷
安田疇探九等和扁沈痾灑然瘳我亦民之一擔石略
不留遭惟本自致未敢忘反求詩來念賢勞效顰聊殺
羞孰視援溺手不計輸幾籌

送羊侯因簡崔帥一首

遊宦何許佳解印還故鄉舊國仍舊都別去未始忘一

旦吾眼中怡然得徜徉釣處它日梁樹是兒時桑扶攜
擁道周老倪皆壺漿官簿有高下此樂均未央羊侯萬
金將文武擅兩長稜威肅貔虎談兵厲冰霜小作漳濱
卧斗飯方健強胡為倚秋風歸思歌慨慷似聞山陽郊
迓者立堵墻湖鱉九月肥社酒千室香海舶來麋麇江
戶送鱖魴舉白作鯨吸羅幙同春陽樂事有如此夙志
今始償我袖如椽筆落紙煙雲翔自今小畫錦為君記

新堂

題陳守宰仁和無倦堂二首

仲尼治道師今古誰造閩公與由也果有得非二本為
政貴無倦聖語要自反吾宗宰仁和條教仰瓴建吟對
千挺竹日課五升飯膠擾付冰解隱幽莫形遜器資銅
百鍊心地蘭九畹人絕懸魚續自詭割鷄偃秉心寧作
輟提耳悟頑諉豈伊不可耐据以為益損譬如歲豐凶
良農守穠菴功名自民庸君子計歲晚

陳侯昔為邑鼓舞輦轂民爾來佐淮郡喜詫有脚春例

滿篋志望正繫不已純帖焉受馴擾初豈煩令申撫臨
不云倦依然舊持循終始秉厚德邇遐沐深仁報政已
捐日設施方日新羣蠹繼革熄千棟成逡巡向來簡齋
僊九德罄忱恂長源無涸流盍嘗究所因一印妙心傳
千載挹聖真此學不勝用企公嗣前塵

次韻楊宰

留別業偶雪欲作詩
未暇因詩見及次韻

有新尚濕惡有穀未舂簸病客正牢落急雪忽蜚墮
腹亟問炊曲身可欠火簷隙納璀璨座隅紛碎瑣續漂

纔一瞬彌滿已四野慨念菜茹農負愧吾顏赭人同忍
朝饑神亦輟秋社吾村劣收穫猶幸了眼下嗷嗷聞見
間久已絕貸假何人發陳紅倚待由也果

次韻楊宰對雪有感

生世波上舟高下隨掀簸樓閣或藩溷風花聽飛墮榮
利計圭黍光陰付膏火胡不養弘大而顧蹈鬼瑣君看
前宵雪積玉曉覆野朝陽麗山川湛碧仍眩赭簿書辦
官事酒肉趁村社長翁取意適吾策未云下優服作貴

賤觀傍了真假平生招隱詩尋盟逮今果

贈張德恭

張作詩日進有句
見推次韻謝之

少日試推敲未脫蜂鶴病世間十全手噬肯愛三請即
今悔少作草草生氣盛逢人忍脩縮拜手博是正往往
掉其臂百叩不一應顛顛仰前脩萎憊不能勁從君父
子遊似頗識蹊徑使君唾隋珠枚叟每後乘郎君撞烟
樓楚珩復相映兩豪五字律萬象一清鏡臏馥副羣趨
餘風振不競郵城望迎鑿未敢憚奔命向來從渠後無

乃瑩吾聽回省多岐亡滿冀一語訂此篇尤愛我見推
乃見警政使元白前向君亦脩敬

次韻張守阻水

予訪使君于真州
沿塗亦膠舟故云

清篇方鼎來強韻不可柰
膽掉久未定如守上龍施
渾厚出綺麗平談含頓挫
正始歎不嗣黃初君突過
想當舟陷泥勢若右旋磨
河神要好句待君顏一破
我行阻重壩倍費客炊火
邗溝塵欲揚人步溝尾汜
一雨濯旱枯此惠誰所假
生世天不人孰者可弔賀

遊北山

張守送酒次敬
字韻作詩謝之

有客可與遊，闕酒得無病。豈意四從事，過我不待請。洗
杓挹風度，免慙林花盛。公學此味如，渾厚兼醇正。公量
虛谷如有來，良善應肯分。兵厨漉少佐，筆力勁罷營。杖
頭錢徐取，松間徑登臨。舊能賦七發，踵枚乘。此興老未
衰，西日尚餘映。風怒雷再鼓，雲破天一鏡。山花下野鳥，
詩題一堪命。府公文章伯，聲稱聳羣聽。明朝倒錦囊，非
是庶所訂。豈伊綵鳳鳴，而聆露鶴警。定知謝東山，凡百

易子敬

再次韻

春月驟寒
既晴小出

當臘可折絃羣植不告病春令宜畫一驟寒乃竒請淙

闕

雨後摧拉北風盛倚戶頸為縮引

闕

逢袖手謝酬應坐歎花信遲隄怯弓力勁今朝晴
色好呼童掃幽徑客子踏青約久許陪驂乘逶迤望北
山蒼柳俄蔭映乾鵲語紅樹遊儵噉明鏡平時詩酒社
賈勇與春競即今鶯花前欺客頗方命擊轅歌于為寧

入俚耳聽喧靜交戰間詩老儻能訂寓物不流物古語
方自警追隨黃白郎不擬繆為敬

吳節推趙楊子曹器遠趙子野攜具用韻謝之

平日從俊遊寂寂坐多病犯床漫飛埃瑤笙罷重請

犯床

置樂器床謂宮調相
犯脩樂器惟笙日請

昔遊喜復到風物他日盛坡恐名

燕支樓亦詫端正新交間舊友氣合宮羽應譚塵冰霜
厲筆陣鴉鶴勁吏隱分樂地與世不好徑拔貧辦一歡
挾貴輕百乘四豪載酒過講德珠壁映歌奏雲近人舞

罷驚顧鏡醺醉忘主賓笑語似紛競朱樓識阿眇白酒
醉師命明朝耐殘醒江聲醒幽聽此樂謫仙後同異君
試訂四豪成風手可但隻字警我投詩社名拜手敢貌
敬

再次敬字韻

張守名飯卧疾不赴
主簿送和章再作

陰風推行車歟作三日病使君敬愛客重此折簡請碧
香駢柔嘉虛辱禮意盛老衰已不支節候况失正寒事
動奸時暖氣久未應積雨遷厥怒密雪佐其勁新詩挽

春色墮我桃李徑飄蕭尋芳興亟問果下垂把君珠兩
兩後照仍前映重燒見火浣百鍊乃寶鏡折筮敵可答
歌風楚不競讀檄且觀濤壽我無有命舊聞句通神瘡
鬼褫魄聽援君起廢手直用古賢訂笑送夢中豎子行
良機警亦笑齊東翁口舌邀客敬

再次韻張簿

生世詩作癖頗坐艱局病當前成風手每來難塞請後
身習鑿齒名儷乃公盛新詩再出奇後出尤雅正高吟

步芳園靈籟想隨應荆戶厭盧羅陳勢無前勁鉤隱度
九軌眇睨秋蛇徑狐兔新竄伏願前王公乘我學但宋
璞多慙楚珩映才與年貌衰不擬拂晨鏡妙句駢魁傑
曩見絕夸競居然大小巫詎容耻受命目窺曹劉墻日
有韶護聽古今尚論問未遽優劣訂此意客未知太簡
效規警平生孔文舉敢替此心敬

分韻得家字

以人家寒食月花
影午時天為韻

東園郡勝處不作里所遐池臺掇天巧草木專年華一

雨洗清曉十頃圍紅霞云何秉燭客未駕載酒車掾郎
郡之望士價詩名家折簡挽名勝行庖富柔嘉清風應
靈籟高譚振衝牙酬酢角鯨吸賡和紛天葩痛飲未渠
醉浩興渺無涯孰知此老憊坐受強敵加空卷將一旅
堅陣凌五花

時分韻同
某六客

詩成字歌倒病眼正麻嗒

遊乾明分韻得山字

竹風清如水浣我塵埃顏老禪貧無錐小破蔬筍慳短
轅下鷗夷共此半日閑住筆訊鶯燕把盃屬江山老夫

病止飲苦語澁莫刪
揆予郊島寒著君季孟間
江柳未遽折園花且同攀
後夜短亭夢漫寄東風還

小飲頻江樓分韻得俯字

流光肯貸人春事遽如許
眼不到蜚鴻身每念縛虎他
日載酒約坐受陰寒阻非君
韻超俗疇肯顧羈旅今朝
鶯花前有興浩莫禦茲樓可
圖畫山立瞰江滸壯侔彭
城蘇氣吞潯陽庾乘凌脫埃
壘盤甃上煙雨向來狀雄
觀尚欠魁傑語江山君周旋
得句忍不吐詩成人未醉

鄰鷄喚亭午新音略韶濩至樂非簫鼓却話庾與蘇今

古一仰頰

招朱法曹趙宰趙予野飲

以寒食數日得小佳為佳耳為韻分得食

得二字

秦郵望儀真相與不三驛仕學四十年此地幾旅食寓
公芹泮士十九盡親識茲遊最竒偉詩壇許投迹每當
觴詠間不蓋慙頰赤赤手挑虓虎空拳抗雄戟四眇號
猿手未敢箭鋒直排日有勝踐尚恐坐岑寂纔卷頰江

帳復蠟東園
屐小奚費收
攬巨橐珍的
歷摩莎歸裝
富
足容傲侯伯

自公置簿領
來作一笑適
表表三英粲
各各萬夫特
揆予自僑寓
人說有此客
風煙入揮毫
江上皆動色
尚友古所貪
解后歸未得
今朝鄉思動
招邀話睽隔
非復向軒豁
但有新淒惻
吟詩尚爾工
把酒不能喫
縣知短長亭
小蓬雲月白
還應蘧蘧夢
蛩墮清江側

儀真諸公餞別

分韻得永字

旅懷我岑寂詩語君雋永新篇蜚墮前坐閱仙府景曉
林媚紅酣春池涵綠靜叱吸風起籟模寫燈取影東園
固成言此境亦深靚應世足變遷為謀難要領酒車且
新圖客棹非舊整明朝鷗鷺前鴨綠渺千頃飛觴擊鉢
地獨夜起重省還應蓬背雨閑滴魂夢冷

真州諸公語別

得五字

屈指舊新雨何人顧蓬萊駢車各鳴夷良為老夫來古
今漆投膠不獨數陳雷衮衮慰勞意一盃復一盃索句

不解工何以寫別懷敢惜吟髭折柰此雨意催此會良
姱嫿此行重徘徊得無葉舟重滿載離愁回

送趙夷仲南歸

離索老不堪應接意多選愛者挽不留惡者推不去道
人心如水胡復生愛惡方厭塵眯眼倏驚瓊為樹趙侯
南州英中抱經世具碧巖紫電耀翠竹青鸞翥聯翩拜
新作一一彈丸句傾蓋得此友霽月破愁霧交君良恨
晚別我用許遽溽暑挾旱氣河底車取路在客身為本

食眠要將護燕子
溯北風端許問尺素

立秋日

酷暑如酷吏頃刻不可對萬口噤不息束濕底多罪况
我七十翁形劣氣已憊懣若墮丹書孰者我牘背微風
忽鳴秋遽喜又無害天豈芻狗我生死置度外會看三
日雨但悼推所愛甘澤洽嘉穀生意亦蕭艾

寄嚴文炳

以寄聲來問安足音到空谷
為韻嚴寄書存問甚至云

故人千里遠論心未遐棄不謂江淮隔尺書鴈能寄春

風生展掩滿慰別後意陳義凜冰霜不獨相思字

隻影秋鴻驚獨夜秋葉零離索歛五霜搔首聽此聲豈
無金石友相避參辰星安得木作腸與世無復情

子雲草玄宅門徑積莓苔昨夢憑詩說新雨無客來袞
袞手可炙自詫甘寒灰蜀莊寂寞者念我首獨回

烏壘兩馮君風霆藹休問自昔從之遊詩力借餘潤夫
君凜一敵鴻筆上羣俊舊壇今尋盟得句毋我靳

兩馮君謂

真州
父子

嚴子老於菟彪炳踞賢關可憐五車學僅博九品官客
程望至喜江濶山叢攢動懷造物心念子詎能安

善忘常憎醫獨者自尊足嚴子骯髒面如我不諧俗世

情趣操間憎愛岐珉玉饒舌誇我賢祇取白眼辱

文炳
每稱

賞子或者不
然之來書云

聯鑣行樂地俛仰成古今可但捧觴人貫珠無復音繾
綣棋酒伴電泡半銷沈何時兩衰翁話舊同清斟

趙侯當賜環倔强耻媚竈張侯鳴琴手戍期幾時到何

郎偕賢書論價未足道多煩問何如好語君一報

三君與文

炳同居吳子與之厚嘗有詩送之

石湖良樂眼收士冀北空嗟我孤所期經世老無庸一

莊賴芥庵報厚艾亦豐實實得美謚表表無終窮

來書及二

云公故

嚴子從我時脩竦峙雙鵠章綬裹瘦軀此相胡宜肉當
嗣溧陽尉苦語叩哀玉寧當蘇門翁清嘯荅幽谷

次韻楊宰檢旱野宿

予近亦頻至莊上人情備嘗也

早後訪親知悲風塵愁霧未辦飽翳桑况能嫁阿鷺令
君妙為政果藝今求路道逢枵腹民挾纊誦言句保社
知自愛攸攘可無慮飛騰要及時封殖須此樹來年步

畏壘繪象各村野

時宰君
垂端

題劉行父淨香軒

劉郎何所有寒碧二百本方渠懋進脩藉爾伴蕭散妙
處鼻觀領脩然市聲遠朱墨五千卷日力自繾綣久聞
伯仲間珠璧各積韞一笑挹此君方外得稽阮饑鳳吟

夜良斑犀散春晚慣嘗推枕聽肯作毫羹挽長翁紀幽
致一字粲褒袞譜傳渭川孫石屹益州笋行當游驚雷
龍躍闖天闡功名有咄嗟世道計舒卷平昔對床約里
閑規息偃大屋俯嬋娟畫繡替前扁

次姜堯章贈詩卷中韻

徐郎巢已焚庭竹亦無在太倉五升米舉室枵腹待云
何鮭菜供日與長翁對世有作金術閭里頗猜怪邱嫂
剪髻餘舊質疊新債

詩傳侯王家翰墨到省寺姜郎粲然文羣蜚見孔翠論
交辱見子盧馬果同異念君聚百指一飽仰臺饋我亦
多病過忍口嚴酒戒終勝柳州吐水賦解崇

壯年志在行皇皇困無君老矣此念灰去住如閑雲詩
壇二三子一見勝百聞徐郎吳下蒙絢麗工語言滔天
自濫觴昔人求其源隱几有妙領未覺市聲喧

自甘謝祖風屑屑掃一室準擬高史來函丈置三席聲
名絕輩行文字追古昔黃白馬上郎覲面不相挹

眼青節食事日耐饑雷吼茲幸陪衆後酒卮甫到口不
離寂寞濱徑造無何有問津歸有期尚許尋盟否

次韻林子長計使

林侯上州麾便飫大官飯左淮魚稻供顧肯回一眄待
人均待士樂易屏崖岸懸知訖民庸功倍而事半淮鄉
舊樂土兼有齊俗緩頃來南北雜頗復煩城旦要須禁
紋攘淮鄉歸正人誘率江浙遊手剗佃良民之田計使約束甚嚴淮民安妥立可息愁歎
為公泚銀筆攘袂歌粲晏

次林子長韻

招燕拂雲樓讀子長
遊壯觀亭詩因賦

孤亭屹山椒山靈信多助比肯迂玉節來作數刻住江
明山動色取重以公故未須坐譚客子弟自翹楚雲嵐
遠明滅阡陌隨指顧何以驗人情楚飲雜吳舞我來空
想像夢去上煙雨尚及拂雲飲醉狂煩杜舉新歡償昔
遊幸會乃如許古人重一飯志士賦盛遇歸時混遊人
健倒各扶路

再次韻酬林子長運使

繡衣如椽筆可但江山助登樓得秀句飛雲為公住使
君傾意氣接我便親故自忖庸鄙陋兩公富全楚賦雪
容未至高軒先左顧醉鄉信餘地肯作長沙舞和氣挽
春回冰柱下簷雨是日晚晴代舍著狗盜珠履責豪舉
阿遷詫齊魏瑣瑣吾未許我從兩公遊趣舍本神遇更
當問學閒司南取夷路

再次韻

拂雲宴之明日雪復作回思借趙帥賞
雪于淮海樓樂甚茲地足以繼之復賦

一篇

雪神再出奇剪水誰飲助羣仙幻塵寰落勢未肯住政
成氣乃和此瑞豈無故同雲方頌周惡氛已銷楚乾坤
玉花中客子眩回顧人家占嘉平酒處應起舞了知及
物功當倍蘇旱雨前雪淮海燕把酒欲輕舉今雪燕拂
雲勝槩驚似許客途一笑適樂事詫晚遇回思何人家
鷄黍羞季路

陳宣卿為予作後彫圖

吾宗灑畫墨似我詩得趣未至心手忘敢議江山助東

絹十幅圍中有千尺樹窮冬萬蟲蟄拆地雙虬怒彷彿
風雨聲想像棟梁具人間汗反漿對此毛髮豎怪物
寫影落筆神與遇自言閱世孰妙解等僧悟每當槃薄
餘了知精靈聚此圖尤傑出持用博新句墨君第一流
論世無殆庶三熏且十襲復靳為子賦

四言古詩

次趙判宗送李象山韻

邑政易墮我方在行挽袖柅車交遊至情兩君玉峙

闕

崇國士下榻傾倒有賢公子我介三子匪同而和提衡
掖挽交口孰何月堂之評深久未改匿瑕振過茲焉有
待卜夜之飲輟驪駒章顧雖情鍾河魚未康作吏則疎
羨人報政彼益者友工藥我病低昂達窮冥心所遭獨
喜故人往偕仙曹搖搖脩程炯炯初度眷言顧之矯首
雲路胡不小留共頽醉山胡不更僕共譚孔顏西睇歸
觚徙倚悽切去留之間仙凡斯別

再次韻

判宗留飲以冗故不
及終席作詩謝之

載羽其觴客逸于行歸從我私茲焉用情一竒奪秀萬
金論士生世已後識古君子宮倡羽隨至樂則和俚音
間之人謂斯何潔不容緇薰不猶改言受此柄劣副期
待斯道在公九報其章人後時施躋之阜康曾是偉人
而未聞政袖司命手旁睨世病海瀕埤污蒼山周遭觴
詠翱翔樂殊爾曹盍攄胸竒煥我王度盍提公言闢我
賢路赫日中天麗彼南山賡歌交修不覩其顏有鈇者
刀用或一切雲龍從之無重此別

次程帥勸農和陶詩韻

房民種藝簡率水旱豐歉一委之天人力不至

且不知用水車土皆桑柘地而蠶事尤莽鹵因帥勸農和陶詩次韻呈帥且示其民之不

甚愚
惰者

我官于房庸諗房民是腹朽然惟貯一真服事告工以
成以因雄也言之參天以人燥之潤之是有黍稷天不
竟刈物豈自植繫人之力溫飽稼穡惟蠶而衣如稼而
食盍植于家盍桑于陸飼眠後先如族昭穆爰繅爰織
如寇之逐悠悠玩日迄莫歸宿孰溉不車曾不計久孰

視槁乾徒用播耦吳豐楚約誰非朕畝穗斯繭斯均措
厥手彼多其儲汝則易匱傲勞計工寧終不冀蹠蹠十
駕與驥一至朽中赤立吾代爾愧吏職民憂無庸汝鄙
農以濟學繫吾素履豈日多言率遵前軌教詔順從庶
或兼美

程帥和陶二詩見憶次韻

我瞻西郊雲停不雨鷄栖亂山十舍千阻一書緘春慰
厲存撫望之或違搔首企佇停雲醜之蜚雨濛濛啟筒

有獲如渴吸江孤月河漢輕颺牖牕憶侍誨色杖屨後
從盱衡推予褒袞儷榮靡懷不傾靡言不情會晤良難
歛然西征孰謂愁斛無自而生竹萌觸雪粟花綴柯風
日山城未春已和命駕取塗計日不多官曹簡書公其
謂何

江湖長翁集卷六